

編號 1 號

【爛布子歲月】李宜諭原作

六月个南臺灣，鄉下个溝脣、人家个屋前屋背，總會看著青青黃黃、細細粒、打到歸樹極个爛布子。又到斬爛布子、擇爛布子、攪爛布子个時節咧，該係記憶裡肚个好味緒。

頭擺，阿婆在楊寮下田脣兼溝仔个位所，種三頭爛布樹。逐年五、六月，爛布子好摘咧，寮日个打早，阿爸就會用奧多拜載僱恁多姊妹，奧多拜个後架仔還拖等一臺里阿卡¹，去楊寮下斬爛布子。去到楊寮下，遠遠就看著阿公既經背等大鐮仔在該剝樹極咧，一枝一枝大大梗个樹極剝下來，阿爸就摺大樹極拖拖共下，再過摺掛等爛布子个部分，一細極一細極剝下來，僱兜細姪仔就搵手摺爛布樹極張到布袋肚。最尾，阿爸會摺一布袋一布袋个爛布子，上到里阿卡頂載轉屋下去。

轉到屋下，阿姆早斯摺一隻大腳盆放在天井町。爛布子倒到腳盆肚再過張滄水，大家就圍等腳盆，坐在楯頭頂，開始擇爛布子。因為剝忒蒂頭个爛布子會有液液个乳，所以，兩隻手愛浸在水竇肚，一隻一隻擇。擇好个爛布子放在細盆仔裡背，無愛个梗

就掉到大腳盆脣。兩隻手浸水浸昶久咧，手指就會皺皮皺皮，當像老人家个手，有滴仔得人驚。

因為愛一細極一細極緊搵、緊尋、緊擇，下把仔會昏嗲昏嗲²，無細義摺梗掉到細盆仔裡背，爛布子嘎揸在盆仔外背，分醒咧正煞煞摺擇好个爛布子拈轉細盆仔裡肚，正式係加無閒个。

滄滄一腳盆个爛布子差毋多愛擇完點鐘。阿婆會摺擇好个爛布子倒到大鑊頭裡背，窿樵燒火，還愛緊攪，正毋會結喇。爛布子煮熟咧，還燒燒就愛舀到碗肚摺鹽去攪，鹽較多一息較該變砣。就恁樣燒手燒腳無閒一日，一砣一砣个爛布子總算做好咧。

爛布子加蒜頭煎到赤赤一等好食，下擺仔摺雞卵去煎又還較香，係細人仔最愛食个。僱爸為著愛拐僱兜細人仔食飯，就教僱兜一細砣爛布子傍一大口飯，飯先吞落去，再過用當門牙咬等爛布子仁，用舌嫵西啊出³，看麼人个爛布子仁射最遠。所以，逐餐飯都緊搞緊食、嘻嘻哈哈。

該段擇爛布子、西爛布子仁个日仔，乜係僱永遠記在心个幸福歲月。

¹ 里阿卡：音 li+ ia ka`；外來語，兩輪拖車，可以人力拉動或連結於車輛後方。

² 昏嗲昏嗲：音 fun de fun de；頭腦不清楚。

³ 西啊出：音 te` a+ chud；吐舌或用舌頭將口中之物剔出。

編號 2 號

【該下】林伯殷原作

「投手擲出球仔」、「打擊者出力一晃，球仔飛向一壘！」、「哦！一壘手跔啊下接殺，黏時用腳踪轉壘包，一壘跑者赴毋掣走轉一壘，再見雙殺！」「臺灣贏咧！臺灣贏咧！臺灣得著世界棒球十二強比賽冠軍！臺灣冠軍！臺灣冠軍！……」電視主播喊到聲骸會失忒咧。該下，球場裡肚个臺灣選手噉咧、教練噉咧、現場摻電視面頭前个球迷也噉咧。該時節，臺灣人非常感動，也當沙鼻，因為，這群選手實現臺灣人打野球个百年夢想咧，完成臺灣人望當久，毋過毋識望著个心願咧。

日頭下，一群晒到烏刻刻个球員在球場練球，聽等教練个指導摻示範，認真學習各種基本動作。一擺又一擺練，就算汗流脈落，衫褲溼忒又燥、燥忒又溼，也無歇睏一下。恁樣煞猛練習，就係為著在比賽个時節做得有好个表現、好个成績。臺灣對少棒到成棒，各地各級个選手都係一路打拚上來个真材實料。好得恁多年，臺灣打野球个環境有改善咧，培養出當多有名个球員，正有好點出恁多个人才，組成恁勻線个球隊來代表臺灣出戰。所以，係有大家个長期投入，正有打贏比賽該下个歡喜、感動摻目

汁。

除忒長期个努力，也愛有當多頭過个該下，正會有包尾光榮个該下。像：嘉義農林野球隊得到甲子園亞軍、紅葉少棒隊、三級棒球隊去美國比賽得冠軍、臺灣職業棒球開始、臺灣球員加入大聯盟比賽等等。這一擺又一擺个該下，分大家一次又一次來關心棒球比賽，這種熱情一直在恁俚个心肝肚，毋識烏忒，臺灣个棒球歷史正有機會寫到拿十二強冠軍該下。當然，該下還吉結束，因為，棒球比賽還係會繼續參加下去，相信還有當多感動人个該下會接等下去。

臺灣人有好沙鼻、有好分人安腦該下，表示大家識打拚過咧，像：棒球、羽毛球、晶片製造、全民健保這兜，斯係大家打拚个結果；反轉來講，大家有打拚，臺灣人正有好沙鼻、分人安腦該下。

編號 3 號

【貓鬧鐘】徐姿華原作

因為驚會睡過邊，佢從細斯有設鬧鐘个習慣，讀書時節會用鬧鐘，這下會用手機。愛睡目以前先定好時間，時間一到，鬧鐘个音樂斯會響，摻宕睡个佢對甜甜个夢肚喊醒、對燒暖个被竇拉出來。分鬧鐘吵醒雖然當毋甘願，毋過總比赴毋著上課、上班，分先生、頭家刻臭頭較贏。

這恁久，佢又多一隻鬧鐘。這鬧鐘當生趣，有幾下種方式喊人跣床，分這鬧鐘喊醒，心肝肚毋單淨毋會慍悴，顛倒會開容笑面，歡喜甘願跳下眠床，還會有歸日个好心情呢！係麼个鬧鐘恁好用？哪位有好買啊？這鬧鐘孤行獨市、無哪好買，單淨為佢服務定定，這斯係佢个貓鬧鐘——咪咪。

普通時節，手機个鬧鐘響，佢若係還再過忍床¹，佢斯會喵喵滾緊喊，無斯用佢粗鱗鱗个舌嫵舐佢个手，提醒佢好跣咧；佢乜會摻佢細細个頭那鑽落佢个手巴掌裡肚，做嬌討愛掌頭那。恁得人惜个動作，麼人還睡得落覺？黏時斯跋跣起來，認真掌佢个頭那、撫身，掌到時間及及咧正停手。

有一日朝晨，時間到咧，佢个手機嘎無響，佢還睡到屎肫孔孔、迷迷痴痴，試著有東西在該揪佢个禱。目睡摸些嘎看著咪咪用牙齒輕輕咬等佢个禱，揪一下、揪一下，放忒一下又過來咬。佢當細義無咬著佢个腳髀，毋過，也摻佢喊醒咧。好得佢，該日上班正無慢到。

還有一擺，拜六毋使上班，佢挑挑無設鬧鐘，當在該發夢食大餐，結果，肚屎、胸脯嘎分人砣等，感覺重重、痛痛。目珠一擘啊開，摻咪咪四目對相。五公斤个佢企在佢肚屎面，低頭看佢，當像在該問講：「人，你毋使上班咩？仰還毋遽遽跣床？」哀哉～這貓鬧鐘實在還生趣哪！等佢跣床咧，佢斯會坐等看佢出出入入，無閒準備上班，等佢愛出門咧。佢正尾翹高高行過來，在佢腳脣徑兩下、喵兩聲，當像係摻佢講再會。

這咪咪，本旦瘦夾夾在公園流浪，來佢屋下三年咧，佢對驚人到接近人，這下嘎變成黏人又錫人，佢乖又即靈，實在分人惜入心。若係你也有一條恁得人惜个貓仔，日日做你个鬧鐘，有幾幸福你知無！

¹ 忍床：音 ngiun` cong；賴床。

【好得，水落過咧】彭瑞珠原作

月光，在高高个天頂，分薄薄仔、火灰柑个雲遮等；囡在雲背个月光，懶懶、毋想停動。闊闊、無麼个風浪个海面，一遍恬靜，就單淨，遠遠、天邊該，兩三點仔漁船个電火，跔等無麼个想徒步个時間瞞啊瞞仔。

海面正片側角个烏暗肚，一條像山蟻公恁大个鑽石碎痕，對海天之間順順仔遊等來。「係麼个船仔呢？佢个電火，仰恁幼？」「哪係幼，係幾下排電火層等，有錢人个船仔唷！」「毋係漁船，係大船仔呢！」該係貨輪，抑係風力發電个工程船呢？都毋像。佢用二十節¹个速度，遊啊遊仔，遊到遠遠个頭前中央，分佢兜看真。

「一、二、三、四……」、「船面，最少有五排電火……，啊，係載人去寮个郵輪啦！」「佢愛下南抑係上北？駛去哪隻國家呢？」煞煞，撈出手機，毋使過揣咧！

根據阿古哥²个地圖，臺灣最北个燈塔——富貴角，在左手片

較過去一息仔；正前方，該係……啊，愛去日本啦！船仔，就照等阿古哥講个「北方」，直直駛、駛到毋見忒，留分佢兜去「回想」。回想，千過儕共船遠寮个快樂，上擺，佢兜也識定過該船頂最高棧个間房，照這下个時間來看，係食宵夜……。

玄風，一隻烏影對左手片掙啊過³，實在還緊性！順等佢掙出來个方向，路燈照等个圍欄角，一隻五彩个蜷崎絲圓網脣頭，分一隻蝶仔撞爛一大空。一對晟光、晟光个蜷崎子哀，慢板慢板、恬恬在網脣看，顛倒係佢兜替佢道嘆。

唉，看一暗晡灰暗个海面咧，好駛車仔轉去睡目咧！行到車脣正發現，青青个草坪軟忪軟忪⁴，草坪面滿哪仔都係靚嫩个細黃花。係啊，水落過咧，薄雲開始散，滿天……都係幼幼个星光；韶早，會係好天時啊！

好得，水落過咧，蜷崎阿母毋使過涿水整網，還有柔柔个月光、靚靚个花坪摺佢做伴；佢兜也吹著五月涼風、看著海景，供飽不少蚊仔咧。

¹ 節：音 zied；此指速率單位，定義為每小時海里數。

² 阿古哥：音 a+ gu' go`；阿古哥，此指 Google。

³ 掙啊過：音 sio` a+ go`；以極快的速度經過。

⁴ 軟忪軟忪：音 ngion` sim` ngion` sim`；柔軟彈動的樣子。

編號 5 號

【老樟樹个春天】曾俊鑾原作

老樟樹企在路脣毋知幾多年咧，佢个樹身愛三個大人正做得圍起來，歲月在佢个臉身留下永久个跡痕。就像舊年熱天做風搓，盡多樹桎分風打斷截；底下个泥肉也分水沖走，跣跣糾糾¹个樹根分人看現現。該兩時，佢分暴風吹到拗腰，強強會橫下去。前一站仔，又堵著最冷个冷天，三日風，兩日霜，在本成結癩个地方切開還較深个傷口。

等最尾一擺寒流過忒，火蛇²緊曠，暗雷³響，老樟樹略略仔感受著對遠方傳過來沉沉个鼓聲，該係春天在地泥下睡醒个信號。佢先擘嘴擘鼻，續等伸一下腰骨，跲等風个節奏發出「喀喀」个聲音。空氣裡背開始鼻著一種特殊个芬芳，該係南方吹來溫暖个水氣，合等黏時會必芽个新生命味緒。

起先係該兜毋打眼个鵝鴿酸⁴摻臭頭香⁵，佢兜有一滴仔畏羞，對老樟樹腳下个地泥肚摻頭那探出來，嫩習習个葉仔挽等金若若

个露水。老樟樹摻這兜小生命低言細語，歡喜佢兜來共下迎接久違个春光。

初春个暗晡總係有一息仔清冷，北風合等水毛仔毋多知就到來咧，水點輕輕仔打等老樟樹个葉仔，演奏一首和諧个夜曲。這兩水滋養燥絲絲个樹根，也洗淨一身个塵灰。過無幾久，北風停，南風起，老樟樹看著燕仔跲等風來到，老朋友轉來咧。佢兜在街路个屋簷下無閒直掣，對河壩脣銜泥整舊年个老竇，流線型个身胚在藍藍个天頂劃出優美个弧線。佢兜係春天个使者，帶來對生命个祝福。

老樟樹下肯定定仔鬧熱起來。堵到燒暖个日仔，莊肚个老人家會在樹下行棋、打嘴鼓，耕種人會憑等樹身歇暈，放學个細孺仔會在佢四圍搞份家啦摻園人尋。老樟樹企到澄澄神氣百貫⁶，就像高長大漢个巨人，佢用闊闊个樹影為佢兜抵日頭，用輕輕个鼓氣為佢兜送涼風。

對眼前个情景，老樟樹當感動，滿心歡喜。佢看向遠方，高山崑頂⁷、平洋坑壠，都既經換忒灰色个舊衫，濛濛个濛煙下背係新色个大地。一陣風吹啊過來，老樟樹个桎桲跲等風搖啊搖仔，佢毋堵好嘎啄目睡，一曠目，幼嫩个新葉就在手指頭町綻筍。

¹ 跣跣糾糾：音 gio` gio` giu` giu`；彎彎曲曲。

² 火蛇：音 fo` sha；閃電。

³ 暗雷：音 am` lui；閃雷。

⁴ 鵝鴿酸：音 pug` gu` son`；酢漿草。

⁵ 臭頭香：音 chiu` teu hiong`；香附子。

⁶ 神氣百貫：音 shin hi` bag gon`；精神勃勃。

⁷ 高山崑頂：音 go` san` gien` dang`；高山山脊。

編號 6 號

【拈著一隻青丟仔¹】范振新原作

舊年 6 月个一日下晝，一陣風時水過後，佢去雜貨店个路項，遠遠看著一隻毋知麼个東西在淺淺个水窟裡肚蠕蠕動，佢煞煞行前去看真兜仔，原來係青丟仔个鳥子。

佢心肝肚胚想，敢係頭先分大水打下來个？跔等斯聽著佢「啾～啾～啾～」个叫聲，佢頭臥臥尋，看有厥爺哀無，嘎無尋著，又看該樹仔恁高，想愛摻佢放上去也無法度。看佢冷到激激顫，驚怕佢會消忒，高不將帶轉屋下去照顧。

該暗晡，佢無睡好，因為差毋多隔兩三點鐘就愛跣床飼鳥子食水。逐擺飼佢食水个時節，就用手指滴一滴水在佢个嘴脣，佢个舌嫵就會凸出來，摻水喲落嘴肚。該兩時，佢還毋會食飼料，佢愁會畜毋生，好得到第二日，佢就會討食咧。

見擺肚屎枵个時節，佢个頸根會擲到長長，嘴擘大大，還會盡命拈叫「啾啾啾啾啾！」搶等愛食。佢煞煞摻飼料摻兜水，用細湯匙灌落去，一口、兩口、三口。鳥子逐擺都食無多，所以盡

遽斯枵，愛輒輒去飼佢，還又食啊飽就睡目，正經係食飽睡、睡飽食。

拈轉來畜無一隻月，斯會飛咧。青丟仔學飛个時節，會撞來撞去，一下撞著壁，一下撞著玻璃，斯像嬰兒學行路樣，下把仔會跣倒。有一擺佢又撞著咧，就嘴擘擘像失魂樣，恬恬企在鳥籠頂無停動，分佢盡愁慮，檢查過後，好得無仰般。就恁樣跌斷腳骨顛倒勇，緊撞緊飛，緊飛緊撞，慢慢仔，佢就越來越會飛咧，速度還當遽，成時會在桌下穿啊過，一瞞目就無看著咧。該載，佢聽得識自家个名仔，喊一聲就會飛轉佢个手叮。飛恁咧就會在佢巴掌嫵歇暈，摻頭那困在翼胛下睡目。

青丟仔係城市盡輒看著个鳥仔，毋過頭擺毋識去注意。係背尾畜這鳥仔以後正發現，在佢戴个屋脣，斷真有盡多。這下係聽著有青丟仔个叫聲，佢黏皮就知附近有青丟仔。佢兜个叫聲盡有變化，逐種叫聲都有佢个意義摻目的，佢聽佢个叫聲大體就揣得出佢想愛做麼个，比論講在該尋伴、分大鳥仔嚇著、撩佢發闕个叫聲，抑係當自然、當舒適時節个叫聲，全聽得出。

在屋下，鳥籠門佢毋識關，隨在佢飛。這下逐日都會聽著佢當輕鬆个叫聲，斯像精靈在該唱歌樣，「啾～」無停。

¹ 青丟仔：音 ciang` diu er；綠繡眼。

【梨情二三事】郭亭好原作

阿公種有一大遍个梨園，春天該時，蓬白个梨花開到鬧煎煎仔，等到熱天，橫山梨斯打到墜極墜椅。頭擺有梨仔「高接」个技術，梨農做下係種橫山梨。橫山梨大嫩隻皮又粗，想愛價數賣著好，包裝以前定著愛先洗過，所以在奈涼該下，長下會看著農家人一屋大細戴等棉紗手袋仔、圍等一隻用水筴透水个大腳盆在該洗大梨仔。

緊工時節，佢恁多個細姪仔會分阿公調轉去搵手。有一擺，表阿哥無認真洗梨仔斯顧搞水，結果一隻像嬰兒仔頭那恁大个梨仔，嘎「啱」一聲輪落地泥下，阿公看著斯咄：「這南蛇、這南蛇！正經係生雞卵無、屙雞屎有。喊佢認真兜毋好過搞咧，嘎連靚靚个梨仔也摺佢輪落地泥下，實在還孤盲哪！」分人刻到臭頭个表哥，嘴嚙鼻翹毋敢過搞咧。

阿婆看著毋盼得，斯講：「好咧、好咧！大家較認真兜，下晝渡你兜共下去果菜市場賣梨仔！」哇！聽著做得跔去賣梨仔，大家个精神斯來咧。尤其係表哥黏時斯企跔起來，當然手摺米籬肚个大梨仔一隻、一隻緊拈落腳盆肚，包裝个時節也特別認真。

看佢兜略略較慢板兜，佢斯會像班長樣緊追佢兜。因為佢知有好食个麵摺仙草冰在果菜市場等等佢兜。

下晝時頭个果菜市場鬧熱煎煎，買果子个販仔像鷓鴣樣，目珠利利在市場滿哪仔巡來巡去，看哪主个梨仔清甜好食；若係分佢看中意个，斯用佢尖尖个背，煞猛摺你啄價數，剝到這兜農民血流血濯。毋過阿婆對自家種个梨仔品質當有把扼，若係販仔來開个價數爭差忒多，佢定著毋肯放，有中意个販仔斯來來去去走幾下輪、膏嗟忒歸點鐘，毋過阿婆共樣恁堅持，最尾該販仔無奈何，斯照阿婆開个價數來買貨。

佢這兜細姪仔看著梨仔賣忒咧，歡喜到緊跳，緊追阿公、阿婆：「遽遽啦、遽遽啦！佢兜肚屎枵到憑背囊咧啦！」麵一兜啊來，大家斯像餓鬼樣，毋驚燒、頭播播大口大口煞猛啖。看佢兜食到汗流脈落，惜佢兜个阿婆，總會再過喊加幾碗透心涼个仙草冰分佢兜食。

該兩時，傍等阿公、阿婆个笑容，摺叔伯兄弟共下搶筭个好味緒，這下，該位有名个麵攤、仙草攤，也尋毋轉咧！

【掌鹽个西瓜】黃美貞原作

佢一直記得細人仔个熱天，係對一隻西瓜開始个。

該年佢小學三年生，阿姆在菜園箍一細埕地，講愛自家來種幾頭仔西瓜食，做得省一息買果子个錢，又做得少食兜仔零塔。第一擺看該頭細細仔个西瓜秧，葉仔面毛鬢鬢仔，生當慢，逐日放學第一件事情就係跔在佢脣頭，看佢有變較大一息仔無。該年熱天特別熱，日頭晒到地泥會難人。佢攞等細錫桶去淋水，還用舊遮仔摺佢抵日頭，細心細意來照顧。

叔婆看著佢日日無閒直掣，笑等講：「你種西瓜比佢還較認真哦！」種瓜來講，叔婆係老手路咧，逐年熱天，佢總會擇兜仔自家種个西瓜來賣。佢用擔竿揸等菜籃，一頭放一隻西瓜，伙房人食飽晝在竹頭下坐寮个時節，佢就切到一賺一賺分大家食看哪。食著該沙沙又甜甜个味緒，大家相賽注文，兩下半就應淨淨咧。

佢種个西瓜總算在避暑該下開花、打子，該日，氣象報導風搓愛來咧，阿爸細心細意去田町摘下來，先放在屋簷下，佢拗等大西瓜毋肯放，緊講毋盼得破來食。食飽夜，一屋人坐在禾埕打

嘴鼓，阿姆拿出一支鋒利个長刀仔，摺西瓜輕輕仔破開析，佢就一路必開來。裡肚有紅啾啾个瓜瓢摺烏金烏金排到齊齊个瓜仁，還有紅紅个西瓜水，水泔泔仔緊流。

佢等毋掣阿姆切，遽遽挖一砵塞到嘴空。甜係甜，毋過比起叔婆賣个，又試著還差一息仔。阿姆笑等搖頭，對灶下拿出一細碟鹽，「來，掌一息鹽試看哪。」雖然試著疑狐還係照等做。無想著，咬一口，西瓜正經變甜咧。該年過後，屋下會種幾頭仔西瓜秧。雖然毋係隻隻恁好，成時生著孬抨孬抨、成時分蟲仔咬，掌兜鹽落去，該西瓜就係童年記憶裡肚最清甜个味道。

這下个西瓜大體對外地載來，外皮亮線、口感共樣，還有摺等合格个紅印仔，毋過佢總係試著少兜麼个東西。係少忒該種自家種瓜時節个期待、日頭下汗流脈落个辛苦。因為正經个甘甜，係園在平凡裡肚，愛掌一息仔鹽，正食得出來。

編號 9 號

【比手機較智慧】李淑娟原作

手機手機，人手一機！現代个學生仔大體都做得講係低頭族。火車頭、捷運站、公車頂，無論坐等抑係企等，耳機一掛、手機一劃，網路世界花喇必駁，像毒品樣恁錫人，頭搖搖仔沉迷在裡背毋想出來。

國中畢業該年，考試个成績還罔罔仔，阿爸送佢一支智慧型手機，交代講愛利用佢好好學習。看等該時行个色目，還有後背該隻缺角个蘋果、專業个三隻鏡頭，佢連等幾下日都暢到毋使食飯，單淨笑斯會飽。

高中生活強調自主學習，無人掌等讀書交作業，想讀幾多內容、愛加強哪隻科目，都愛靠自家規劃，加勝先生無恁嚴條，分線上遊戲錫著个佢，一下失算，尋毋著學習个動力、讀書个目標，作業層三砒四無寫、無做、無交。講也奇怪，較新个流行歌曲聽幾遍佢就會唱，較難个遊戲搞過一擺就當熟絡，毋過聽先生講話就像鴨仔聽雷樣，上課啄目睡、坐等緊領頭。

看佢逐日掌等手機，一離開手機就訥訥暴暴¹緊發闕，長下半

夜轉點咧毋睡目，偷偷匿匿筒等被骨搞到臨天光，阿姆心焦馬亂唸講：「再過搞下去，目珠會青暝哦！」毋知分醒个佢，總係左片耳空落，正片耳空出，又想著奸計——詐屙屎園落便所搞，正經係老古人講个：「懶人多屎尿！」一暗晡愛屙兩三到，一到愛屙完點鐘，無屙到阿姆來碰門絕對毋出來。

一直愛到考試前一禮拜，佢正會開始愁慮，坐在書桌頭前掀開新衝衝个課本，嘎毋知愛對哪讀起勢，牙研目皺拿等原子筆，頭那痛到硬硬會噉忒。過無兩日个好光景，想拚个決心像風恁輕，讀書个計畫比紙較薄，數學哪有遊戲恁生趣，英文廣播哪有音樂恁好聽，懊躁个佢又開始劃手機尋快樂咧。用膝頭想乜知，學期結束个時節，幾下隻科目毋及格，化學連補考个機會都無，唉！實在見笑。

阿婆講過：「路一擺，總毋好再過路第二擺。」這下佢正知，人愛比手機較有智慧，摻佢用做搵手學習个承勞，毋係托等變爛死時間个主人。好好管理時間，規劃學習个節奏，尋出自家个方向，認真讀書人生正毋會輸。

¹ 訥訥暴暴：音 au^ˇ au^ˇ bau^ˇ bau^ˇ；形容愛頂嘴、愛辯解。

115 年全國語文競賽臺灣客語朗讀文章高中學生組（海陸腔）

編號 10 號

【行出去，正有風景】范振新原作

在臺灣，有人講人生在世有三件事情定著愛做：蹶玉山；泳渡日月潭；還過騎自行車環島。雖然講，這兜全無恁該，愛堅耐還愛有體力正奈得何；也有人講，該恁恠个事情，何麼个死苦，食飽袒閒係無？毋過，還係有緊來緊多人相賽去自我挑戰。阿宏乜共樣，摺這三件事，準做佢人生个目標。

從細，阿宏厥爸總會講：「做人做事愛有膽，毋識做過个就愛去試，無試仰會知！」厥爸會恁樣講，斯係希望阿宏愛培養勇敢面對艱難个自信，斯像人講：「敢去就一擔樵，毋敢去就屋下愁。」所以，厥爸當鼓勵佢趕後生，身體較砸个時節，去挑戰人生。受著厥爸个影響，阿宏 18 歲生日該日，就騎等自行車，單人獨馬走去環島。

出發該日一色青天，阿宏打早就著一身運動个衫褲，騎等屋下該臺既經捩臺灣兩圈个腳踏車準備出發。無毋著，這臺自行車雖然毋係當高級，毋過已耐戰，佢兩個阿哥都係騎這臺鐵馬去環島，恁多年來毋識壞忒。出發前，斯單淨加安隻車架仔放包袱，再過摺輪仔个風嘜好就出門。無特別安排路線，乜無按算一日愛

騎幾遠，斯跔等自家个心情來行。

這擺環島無先抽間規劃，正經係「時到時當，無米煮番薯湯」。有幾日斷烏咧還言決定愛在哪歇，臨時臨及正上網尋。壞蹄咧！該日騎到臺東，的對堵著奈日，又無先注文，問幾下間旅社都全無間房，高不將走去海脣个沙灘睡。雖然沙灘無眠床恁自然，毋過，脣頭無別儕，恬靜恬靜，斯聽得著一陣一陣海湧个聲，四圍暗摸叮咚，天頂个星仔一曠一曠。這暗晡，阿宏就在這滿天星光个美景之中睡忒咧。

第二日天矇光，阿宏坐在沙灘，遠遠看著該火紅色个大卵黃對海竇肚鑽啊出來，緊來緊大、緊來緊光。看著這天闊地闊个光景，阿宏在心肝肚想：有兜路，無行過，你毋知風景在哪；有兜事情，無親身去做，你永久毋知自家做得行幾遠。